

ሚልካሳ ቲንቢቴ ጊዶ ቆፋ

ሚልካሳ ቲንቢቴ ማጻፋይ ከርስቶስ ዬሌታናፔ ኢቻሹ ጾቱ ላይሳፌ ካሴ ዬሩሳላሜን ዲዛ ጸሳ ኬላይ ናምእንሉ ኬጾቲዳፔ ጉዬ ቤቲዴስ። ናቤዚ ዳሮ ሚንሉ ቆፍሲዛይ ቄሴታ ጊዲን ወይኮ ዴሬዚ ጸሳራ ጫቄቲዳ ጫቆ ቃላ ኦራጺሳናስ ኮሺዴስ፤ ጸሳ ዴሬይ ባ ዱሳን ጊዲን ጸሳ ጎይኖን ሙ ሚላ ዬዳ ዬዴቲዳ ሞሪቲዳይሲ ቆንጨን ቤቲስ። ቄሴቲኔ ዴሬዚ ጸሳስ ቤሲዛ ያርሾ ያርሾንታ ጊሻሲኔ ካሴ ኢስታስ ኢሜቲዳ ወጋን ኢስቲ ጸሳ ባሌላናስ ፓጨዳ። ሄሳ ጊሻስ ጸሳይ ባስ ባ ኦጌ ጊጊሳናኔ ጫቆ ቃላ ኦራጺሳናስ ካሴቲዳ ከታ ጋሊዛዴ ዬዲዲ ሄሳፌ ጉዬ ዴሬዛ ቦላ ፒርዳናሲኔ ዴሬዛ ጌሻናስ ኢዚ ያና።

ሃ ማጻፋይ ኦይኪዳ ኩሚሳ ቆፋ

ጎዳይ ኢስራኤሌ ዴራ ሲቂዛ ሲቆ 1:1-5

ቄሴታ ቦላ ጸሳ ፒርዳ 1:6—2:9

ጫቆ ቃላ ላሌቲል 2:10-17

ጎዳ ዩስ 3:1-4

ጸስ ባሌላናስ ቤሴና 3:5-15

ኢማኔቲዳይታስ ኢሜቲዛ ወይቶኔ ኢታታ ቃጻዬቲል 3:16—4:6

1 ሚልካሳ ባጋራ ኢስራኤሌ ናይታስ ዬዳ ጎዳ ቃላ፡

ጸሲ ኢስራኤሌ ኣሳ ሲቂዴስ

2 ጎዳይ፡ «ታ ኢንቲና ዶሳዲስ» ጌስ፤ ኢንቲ ጊዲኮ፡ «ኔ ኦና ኣዛን ዶሳዲ?» ጌታ። ጎዳ ጸሲ፡ «ኤሳዌይ ያቆቤ ኢሻ ጊዴኔ? ታ ያቆቤ ዶሳዲስ።

3 ጊዶ ኣቲን ኤሳዌ ኢጻዲስ፤ ኢዛ ዴሬን ዲዛ ዙማታ ባዞ ኬሳዲስ፤ ኢዛ ጋዴዛካ ባዞን ዲዛ ወራካናታስ ኣላ ኢማዲስ» ጊዴስ።

4 ኤዶሜይ፡ «ኦ ካታማቲ ላሌቲን ኢስታ ዛሪ ኤሳና» ኢስቲ ጊን ኡባፌ ወልቃማ ጎዳ ጸሳ ቃሴ፡ «ኢስቲ ዛሪዲ ኦላና ሺን ታ ኢስቲ ኦላይሳ ዛራ ላላና፤ ኢስቲካ፡ «ኢታ ዴሬኔ ጎዳይ ሚርናስ ሃንቄቲዳ ዴሬ ጌቲታና።»

5 ሄሳካ ኢንቴ ኢንቴ አይፌራ ቤያና፤ ኢንቴካ፤ ሒሰራኤሌ ናይታ ዳሬ ጳሳፌ ሃራሶንካ ጎዳይ ጌታ ጋና።

ቦሬቲዛ ያርሾ

6 «ናይ ባ አዋ፡ አይሌይካ ባ ጎዳ ቦንቹሰ ሺን ታ ኢንቴሰ አዋ ጌዲኮ አዛሰ ታና ቦንቹኬቲ? ታኒ ጎዳ ጌዲኮ አዛሰ ታሰ ያዬኬቲ? ጌሰ ሜጴቴላ ጎዳይ፤ ቄሴቶ! ታ ሱንላ ካወሺዛይ ኢንቴና። ሒንቴ ቃሴ፡ ኑኒ ኔ ሱንላ ዋሰቲ ካወሺዳኒ?» ጌታ።

7 ኢንቴ ታሰ ያርሾ ሺሺዛሶን ቱኒዳ ካላ ዋሌታ» ሂሰቲ ዋሊዲ፡ «ኑ ኔና ዋሰቲ ቱኒሲዳኒ?» ጌታ። ኢንቴ፡ «ጎዳ ማዳይ ቶሹቲዳዛ» ጉሳና፤ ኢንቴ፡ «ጎዳ ማዳይ ካጴቲዳዛ ጉሳና።

8 ኢንቴ ቆቄ ሜሄ ያርሾሰ ኤሂዛይሲ ሄሲ ቆሆ ጌዴኔ? ዋቤ ዋይኮ ሳኬቲዛ ሜሄ ኢንቴ ያርሾሰ ሺሺዛይሲ ሄሲ ቆሆ ጌዴኔ? ሄይታንታ ማላ ኢንቴና አይሲዛ ዳናታሰ ኢንቴ አሚዛኮ ኢሰቲ ኢንቴፌ ኡፋይሳን ኤካኔ?» ጌሰ ኡባፌ ዋልቃማ ጎዳይ።

9 «ሃኢ ቃሴ ኢዚ ኑሰ ሚሽታና ማላ ጸሳ ዋሲቴ፤ ሄሳ ማላ ያርሾ ኢንቴ ሺሺን ጸሲ ኢንቴፌ ኤካንዴ?» ጌሰ ኡባፌ ዋልቃማ ጎዳ ጸሳይ።

10 «ታሰ ያርሾ ያርሺዛሶን ጎአይ ባይንዳ ታማ ኢንቴ ኤሶንታ ማላ ኢንቴፌ አሳዳይካ ጸሳ ኬላ ፔንጌ ጎርዲዛኮ አዜ ዲዛይ! ታ ኢንቴናን ኡፋዬቲኬኔ ኢንቴ ኩሼፔ አይ ያርሾካ ኤኪኬ» ጌሰ ኡባፌ ዋልቃማ ጎዳ ጸሳይ።

11 አዋ አርሼይ ኬዚዛሶፔ ዶሚዲ አርሼይ ወሊዛሶ ጋካናሰ ታ ሱንላይ ዳሬ ኡባ ጌዶን ቦንቹታና፤ ቤቶሶን ኡባን ታ ሱንላሰ ኤጸኔይኔ ጌሻ ያርሾ አሳይ ሺሻና፤ ታ ሱንላ አሳ ኡባ አቻን ቦንቹታና።

12 «ኢንቴ ቃሴ፡ ሳዳ ማዳይ ቱና ያርሾ፤ ካላይካ ካጴቲዳይሳን ጌዲ ካወሺታ።

13 ቃሴካ፡ «ሃይሲ ዳቡራ» ጉሳን ሌቆ ሚጺልላ ኢዛ ቦላ ሚጺሊታ» ጌሰ ኡባፌ ዋልቃማ ጎዳ ጸሳይ። «ቦንቄ ኤኪዳ ሜሄ ዋቤኔ ሃርጊዛ ሜሄ ኢንቴ ያርሾ ሺሺን ኢንቴ ኩሼፔ ታ ሄሳ ኤካናሰ ቤሲዜ?» ጌሰ ኡባፌ ዋልቃማ ጎዳ ጸሳይ።

14 «ዶርሳታ ጋርሳን ሎኦ ጳርሾይ ዲዛይሳ አማናሰ አዲኔቲዲ ቃሴ ባሌሶን ኢዛ ቦላ ዋሶይ ዲዛ ሜሄ ጎዳሰ ያርሾ ሺሺዛይይ

ቃንጌቶ፤ ታ ጌታ ካዎ፤ ታ ሱንፊካ ዴሬ ኩሚሊ ባባናስ ቤሲዛ ሱንላ» ጌስ ኡባፌ ዋልቃማ ጎዳ ጸሳይ።

2

¹ «ሃኢካ ቄሴቶ ሃይሲ ሃ ኣዛዞይ ኢንቴስ ኢሜቲዴስ።

² ኢንቴ ታ ጊዛዝ ሲዮንታ ኢጲኮኔ ኢንቴ ኢንቴ ዋዚና ታ ሱንላ ቦንቻናስ ጊጊሶንታ ኣጊኮ ታ ኢንቴ ቦላ ቃንጌል ዬዳና፤ ታ ኢንቴና ኣንጃና ኣንጃዝ ቃንጌላን ላማና፤ ኢንቴ ታና ቦንቻናስ ኢንቴ ዋዚና ጊጊሶንታ ኣጊዳ ጊሻስ ኣዳፌ ታ ሃይሳ ኡባ ኢንቴ ቦላ ኦላና» ጌስ ኡባፌ ዋልቃማ ጎዳይ።

³ «ኢንቴ ጋሶን ኢንቴ ናይታ ታ ሃንቃና፤ ኢንቴ ያርሾስ ሺሺዛ ማሄ ቶጮ ታ ጌዴ ኢንቴ ኣይፌ ቦላ ላላና፤ ኢንቴካ ኢዛራ ኢሲፌ ዳያና።

⁴ ታ ሌዌራ ጫቂዳ ጫቆ ቃላይ ሚናና ማላ ሃይሳ ኢንቴና ቆፍሳናስ ታ ዬዶይሳ ኢንቴ ኤራና» ጌስ ኡባፌ ዋልቃማ ጎዳይ።

⁵ «ታ ኢዛራ ጫቂዳ ጫቆይ ዴኦኔ ሳሮቴላ ጫቆ፤ ሄይታካ ታ ኢዛስ ኢማዲስ፤ ሄሲካ ቦንቾ ኤሂዴስ፤ ኢዚካ ታስ ያዬዴስ፤ ታ ሱንላካ ቦንቹዴስ።

⁶ ኢዛ ዶናን ቱሙ ቲሚርቴይ ዴስ፤ ኢሲ ባላ ሚሺካ ኢዛ ዶናን ቤቴቤና፤ ሳሮቴላኒኔ ሱሬቴላን ታናራ ሄሜቲዴስ፤ ዳሮ ኣሳካ ናጋራፔ ዛሪዴስ።

⁷ ቄሴይ ኡባ ዳንዳይዛ ኡባፌ ዋልቃማ ጎዳስ ኪቴቲዛዴ ጊዲዳ ጊሻስ ኢዛ ዶናይ ኤራቴል ናጋናስ ኣሳይ ኢዛ ዶናፔ ቲሚርቴ ኮያናስ ቤሴስ» ጌስ ኡባፌ ዋልቃማ ጎዳይ።

⁸ ጊዶ ኣቲን ኢንቴ ኢዛ ኦጌፔ ካሬ ኬዚዴታ፤ ዳሮ ኣሳይካ ኢንቴ ቲሚርቴን ቆጶታና ማላ ኦሊዴታ፤ ሌዌ ጫቆዛካ ላሊዴታ።

⁹ ሂሰቲን ኢንቴ ታ ኦጌን ቦንታ ጊሻሲኔ ኢንቴ ኢንቴ ቲሚርቴዛ ዳማ ማዶ ኦሊዳ ጊሻስ ኢንቴ ኣሳ ኡባ ሲንላን ካጴታና ማላኔ ኢንቴ ጉጻና ማላታ ኦላዲስ።

ዩሁዳይ ኣማኔቲቤና

¹⁰ ኦ ወሪካ ኢሳዴ ና ጊዶኮኒ? ኦና ሜጲዳይ ኢሲ ጸሳ ጊዴኔ? ሂሰቲን ኦ ኢሶይ ኢሳስ ኣማኔቶንታ ኣጊዲ ካሴ ኦ ኣዋታ ጫቆ ኣዛስ ቱኒሲዞኒ?

11 የሁዳይ አማኔቲቤና፤ ኢስራኤሌኒኔ ዩሩሳላሚን ሃራሲዛ ሚሽ ሃኒዴሰ፤ የሁዳይ አላጋኔ አላጋ ጸሳስ ጎይኒዛ ማጫ ናይታ ማቾ ኤኪዲ ጎዳ ጸሲ ዶሲዛ ኢዛ ኬፋ ቱኒሲዴስ።

12 ሄሳ ማላ ኦሊዛ አይ አሲካ ሳሎ ጎዳስ ያርሾ ኤሂዛ ጊዲኮካ ጎዳይ ያቆቤ ዱንካናፔ ኢዛ ዲጎ።

13 ቃሴ አንቴ ኦፋና ሃራ ሚሽ ጎዳስ ያርሾ ሺሺዛሶዛ አንቴ አይፋንፋን ሜሻና፤ ሄሳፌ ጉዬ አንቴ ያርሾኮ ጸሎንታ ገሻሲኔ ኡፋይሳን ኤኮንታ ገሻሰ አንቴ ዬካናኔ ዋሳና።

14 አንቴካ፡ «ኢዚ አዛሰ ኑ ያርሾዛ ኤኮንታ ኢጲዴ?» ጊዲ ኦይቻና፤ ሄሲካ ሃኒዳይ አንቴ ጫቆን ኤኬቲዳ ናቴቴፋ ማቼታራ ጫቂቲዳ ቃላ አንቴ አማኔቶንታ ላሊዳ ገሻሳ፤ ጎዳ ጸሲ አንቴ ጊዶን ማርካ።

15 ጎዳ ጸሲ አንቴሲኔ ማቼታሰ ኢሲ አሳቴሊኔ ኢሲ አያናይ ዳና ማላ ኦሊቤኔ? ጸሲ አንቴና አዛሰ ኢሲኖ ኦሊዴ? ኢዛሰ ዋና ቆፋይ ጸሳስ ገሻ ዜሬሐ አንቴ ዬላና ማላ ጊዴኔ? ሄሳ ገሻሰ አንቴፌ ኢሳይ ኢሳይ ባ ማቼይሰ ጫቂዳ ቃላ ፓጪንቾንታ አማኔቲፋን ናጎ።

16 «አይሰ ጊኮ ታኒ ጎዳ ኢስራኤሌ ጸሳይ አዚናይ ባ ማቾ አንጂ ዬዲዛይሳ ኢጲይሰ፤ አንቴፌ ኢሳዴይካ ሄሳ ማላ ጌኔ ኦሶ ኦሊኮ ታ ሄሳ ኢጲይሰ፤ ሄሳ ገሻሰ አንቴ አንቴ ማቼታራ ጫቂቲዳ ቃላ ላዋንታ ማላ ናጌቴቴ» ጌሰ ጎዳ ኢስራኤሌ ጸሳይ።

ፒርዳ ዋዳ

17 አንቴ ጮ ሃዳ ሃሳያን ጎዳ ሳሌሊዴታ፤ «ኑ ኢዛ አዛን ሳሌሊዴኒ?» ጌታ፤ አንቴ ኢዛ ሳሌሊዴይ፡ «ኢታ ኦሊዛይቲ ኡባይ ጸሳ ሲንፋን ሎኦ፤ ኢዚካ ኢሰታን ኡፋዬቴሰ» ጉሳን ዋይኮ «ቱማ ፒርዲዛ ጸሲ አዋን ዲዜ?» ጉሳና።

3

1 «ሄኮ ታኒ ባና ኦጌ ባሳና አሰ ታፔ ሲንፋራ ዬዳና፤ አንቴ ኮይዛ ጎዳይ አንቴ ቆፖንታ ጸሳ ኬሐ ጋኪ ዋቆና፤ አንቴ ኡፋይሳን ናጊዛ ጫቆ ቃላ ኪታ ኤኪ ዬዛ ታ ኪቲዳዴይ ያና።

2 ኢዚ ያና ጋላሳ ቴቃና ዳንዳይዛይ ኦኔ? ኢዚ ቆንጨዛ ጋላሰ ኢዛ ሲንፋን ኤቃናሰ ዳንዳያናይ ኦኔ? ኢዚ ጮጮ ታማ ማላ ዋይኮ ማይኦ ሜጨዛ ሳሙና ማላ፤

3 ቢራ ታማን ሴሪሲዲ ሎኤሊ ጌሺዛ አሳ ማላ ኡታና፤ ለዌ ናይታ ዋርቃ ማላኔ ቢራ ማላ ጌሻና፤ ሄሳፌ ጉዬ ጎዳሰ ያርሾ ሺሺዛ ጸሎ አሳቲ ዳና።

4 ሄ ዋዴ ዩሁዳኒኔ ዩሩሳላሚን ሺቂዛ ያርሾይ ካሴ አጲዳ ዋዴ ማላ ጎዳ ኡፋይሲዛ ያርሾ ጊዳና።

5 «ሄሳ ጊሻሰ ታ ኢንቴኮ ፒርዳና ያና፤ ሙሬኒዛይታ፤ ላይማቲዛይታ፤ ዋርዶ ማርካ ማርካቲዛይታ፤ ዋርዶ ጫቆ ጫቂዛይታ፤ ኦሶ ኦሲሲዲ ሚሻ ዲጊዛይታ፤ አምኤታኔ ዪኦ ናይታ ዴቺዛይታ፤ ቤቴ አሳታሰ ፒርዳ ቱጨዛይታ፤ ታሰ ባቦንታይታ ቦላ ማርካታናሰ ታ ኤሌሳይሰ» ጌሰ ኡባፌ ዋልቃማ ጎዳ ጸሳይ።

አሰራታ አሞ ጊሻሰ

6 «ታኒ ላሜቶንታ ጸሳ፤ ሄሳ ጊሻሰ ኢንቴኖ ያቆቤ ናይቶ! ኢንቴ ጳይቤኬታ» ጌሰ ጎዳይ።

7 «ኢንቴ ካሴ ኢንቴ አዋታ ዋዴፔ ደሚዲ ታ አዛዞታፔ ሃኪዴታ፤ ኢሰታካ ናጊቤኬታ፤ ሃ ታኮ ሲሚቴ ታኒካ ኢንቴኮ ሲማና፤ ኢንቴ ጊዲኮ፤ ሓኒ ኔኮ ዋኒ ሲሚኖ?» ጌታ» ጌሰ ኡባፌ ዋልቃማ ጎዳ ጸሳይ።

8 «አሲ ጸሳ ሚሽ ካይሶቲ ኤሪዜ? ኢንቴ ጊዲኮ ካይሶቲታ፤ ኢንቴ ቃሴ፤ ሓ አይ ካይሶቲዶኒ?» ጊዲ ኦይቺቴ፤ ኢንቴ አሰራታኔ ማባ ታፔ ካይሶቲዴታ።

9 ኢንቴ ኢሰራኤሌ አሳይ ኡባይ ታ ሚሽ ካይሶቲዳ ጊሻሰ ኢንቴ ቃንጌቲዳይታ።

10 ታ ኬፋን ሚዛ ካሊ ዳና ማላ ኢንቴካ ታና ሃይሳን ፓጫናሰ ኣኔ ታማፌ ኢሲኖ ኡባ ሃ ታ ጎታራን ጌልሊቴ፤ ታ ኢንቴሰ ሳሎ ማሰኮቴ ደዮንታ ኣጊኮኔ ኢንቴሰ ዋሊዛሶይ ጳያና ጋካናሰ ታ ኢንቴሰ ኣንጃ ፓላሂሶንታ ኣጊኮ ቤያንዴታ» ጌሰ ኡባፌ ዋልቃማ ጎዳ ጸሳይ።

11 ታ ኢንቴ ጊሻሰ ኢንቴ ቢታን ሞኪዛ ካፋ ቆሂዛ ሚሻቲ ኢንቴ ካላ ሞንታ ማላ ታ ሃንቃና፤ ኢንቴ ካፋይካ ሚቲቴና፤ ኢንቴ ጋዴ ጊዶን ኢንቴ ቶኪዳ ዋይኔ ሚሳይ ኣይፌይ ባይንዳ ጮ ሚላ ዳና፤

12 «ሄሳፌ ካሊዲ ኢንቴ ዴሬይ ካሎ ቢታ ጊዲዳ ጊሻሰ ሃራ ዴሬይ ዉሪካ ኢንቴና ኢንቴ ኣንጃቲዳ ዴሬታ ጊ ጴይጋና» ጌሰ ኡባፌ ዋልቃማ ጎዳ ጸሳይ።

13 «ኢንቴ ታ ቦላ ጸላቴፋ ቃላ ሃሳይዳታ» ጌሰ ኡባፌ ዋልቃማ ጎዳ ጸሳይ። «ኢንቴ ጊዲኮ፤ ሓ ቦላ ኦ አይ ሃሳይዶኒ?» ጌታ።

14 ቃሴካ ኢንቴ፥ «ጸሳስ ኦሶይ ሃዳ፤ ኢዛ ኣዛዘታ ናጎይኔ ማዴቴፋ ጎዳ ሲንፋን ሙዞቲዛ ኣሳ ማላ ዴኦይ ኑና ኣይ ማዲዴ?»

15 ሃኢ ኑ ኦቶራንቻቲ ኣንጃቲ ዲሺን ኢታ ኦሊዛይቲ ዱሬቲሺን ጸሳ ፓጪዛይቲ ኬሲ ኤኪ ኣቲሺን ቤዮስን ጌታ» ጌስ ኡባፌ ዋልቃማ ጎዳ ጸሳይ።

16 ሄ ዋዴ ጎዳስ ባቢዛ ኣሳቲ ባ ጋርሳን ኢሶይ ኢሳራ ሃሳዬቲዳ ጎዳ ጸሲካ ኢስቲ ጊዛይሳ ሎኤሊ ሲዬዴስ፤ ጎዳስ ባቢዛይታስ ቃሴካ ኢዛ ሱንፋ ቦንቹዛይታስ ኢስቲ ኦሶይ ባሌቶንታ ማላ ቆፍሲዛ ማጻፋይ ኢዛ ሲንፋን ጸፊቲዴስ።

17 «ታኒ ኦሊዛ ጋላስ ኢስቲ ታስ ቡዞ ሚሽ ጊዳና» ጌስ ኡባፌ ዋልቃማ ጎዳ ጸሳይ፤ «ኣዋይ ባስ ኦሊዛ ና ኣሺዛ ማላ ታኒካ ኢስታ ኣሻና።

18 ሄ ዋዴ ቃሴካ ጸሎኔ ናጋራንቻ ጊዶን ጸሳስ ኦሊዛይታ ጊደኒኔ ኦቶንታይታ ጊዶን ዲዛ ዴማቴፋ ኢንቴ ቤያንዴታ።

4

ፒርዳ ጋላስ

1 «ሄኮ ጮጮ ታማ ማላ ኤጲዛ ጋላሲ ያና፤ ኦቶራንቻቲኔ ኢታ ኦሊዛይቲ ወሪካ ማላ ሃፓ ማላ ጊዳና፤ ሄ ያና ጋላሳይካ ኢስታ ጹጋና፤ ጹራካ ጸጶካ ኣሼና» ጌስ ኡባፌ ዋልቃማ ጎዳ ጸሳይ።

2 «ታ ሱንፋስ ባቢዛ ኢንቴስ ቃሴ ጸሎቴፋ ኣርሼይ ባ ቄፌ ጋርሳን ፓሊዛዝ ኤካ ያና፤ ኢንቴካ ቢርሺ ዬዲዳ ጋሎ ማራ ማላ ጸኢቲሺ ኬዛና።

3 ታኒ ኦሊዛ ጋላስ ኢንቴ ኢታታ ኢንቴ ቶሆ ጋርሳን ዬፋና፤ ኢስቲ ኢንቴ ቶሆ ጫማ ጋርሳን ቢዲንሐ ጊዳና» ጌስ ኡባፌ ዋልቃማ ጎዳ ጸሳይ።

4 «ኢሰራኤሌ ናይቲ ኡባይ ኣዛዜታና ማላ ታኒ ታ ኦሳንቻ ሙሴ ባጋራ ኮሬቤ ዙማ ቦላ ታ ኦሚዳ ዋጋኔ ኣዛዘታ ቆፒቴ» ጌስ ኡባፌ ዋልቃማ ጎዳ ጸሳይ።

5 «ሄኮ ኬሂ ጊታኔ ያሺሲዛ ኡባፌ ዋልቃማ ጎዳ ጋላሳይ ጋካናፔ ካሴ ታ ኢንቴስ ናቤ ኤላሳ ዬዳና» ጌስ ኡባፌ ዋልቃማ ጎዳይ።

6 «ታ ያዳ ቢታ ቃንጌፋን ጳይሶንታ ማላ ኢዚ ኣዋታ ዋዚና ናይታኮ፥ ቃሴ ናይታ ዋዚና ኣዋታኮ ዛራና» ጌስ ኡባፌ ዋልቃማ ጎዳይ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b